

四庫全書

史部

欽定四庫全書

史部

平定金川方略卷二十四至  
六

詳校官編修臣曹振鏞

編修臣裴謙覆勘

總校官知縣臣繆琪

校對官學正臣李巖

謄錄監生臣于希賢

欽定四庫全書

平定金川方略卷二十四

二月壬辰經略大學士忠勇公傅恒奏言莎羅  
奔等於正月二十日遣頭人具稟細訴向來愚  
蠢無知初與隣封構釁後則畏死自守非敢抗  
拒

夫朝今易子析骸竄身無地呈獻甘結遵依六事又  
賁牛羊皮幣驢列營門叩求收納臣以元兇並

未面縛來營峻拒其請該酋又屢稟自知罪重  
如山到營難希倖免哀懇求生情詞迫切臣仍  
不允賊勢益窮轉求縛斯甲土司哀懇提督岳  
鍾琪代稟以冀格外開恩赦免一死提督岳鍾  
琪見其中心誠服許為代稟該酋踴躍歡欣即  
迎請提督從賊巢之勒歪刮耳崖前來卡撒大  
營虔備夫馬伺候迎送壺漿夾道供張殷繁極  
其恭敬驚悚經提督岳鍾琪來營備陳該酋言

語情形臣傳恒終不允其所請伏思該酋罪惡

重大久稽

天誅此時惟有面縛投營泥首伏辜或可請

命於

朝冀格外寬宥之

曠典若窮蹙乞命又懼誅不出何容假易不日大兵  
到齊銳師深入俘馘渠魁殲除醜虜實屬法所  
當然是以尚在籌畫進勦乃正月二十八日奉

到

諭旨令臣傳恒納降班師臣伏惟我

皇上好生為心包容為度以化外遠夷不足深較但  
使服罪輸誠不妨兼覆並載仰見

皇上伐叛柔服義盡仁至又

軫念軍營將士戮力同仇川省民夫輸將恐後疆場

鋒鏑之危老弱饋餉之苦時時上厪

宸衷惟期攸往夙吉不欲久為煩擾此誠

聖天子息事寧人之至意今

明旨頒來適在納款投誠之會臣自應仰體

聖心相機辦理伏思金酋向與諸番構隙不過穴中之鬪原非抗衡

天朝此次大兵來營未及三分之一而賊已窮困乞降即俘戮之不足為武臣等公同商酌允准納降隨據該酋於本月初四日遣令番衆於軍門之外除道設壇鋪陳供張初五日早莎羅奔率

衆來降從前因莎羅奔係土司郎卡係土舍是  
以止莎羅奔一身請降今至期郎卡亦隨來營  
據稱若不來見恐終不能免伊之罪臣傳恒陞  
帳受降臣傳爾丹臣達爾黨阿臣舒赫德臣尹  
繼善臣策楞同至營門莎羅奔等率衆喇嘛及  
頭人番衆跪迎皆服鮮衣舉香作樂臣傳恒至  
帳中莎羅奔先領衆頭目俯伏帳下臣傳恒責  
以爾土司世受



皇恩乃不法生事侵擾隣封並敢負固抗衡罪不容誅莎羅奔悚懼戰慄稟稱上司如同螻蟻豈敢

抗拒

天朝緣居衆土司中每被欺凌欲往成都控訴無路可通不得已用兵抵禦以攄夙憤致煩

天兵問罪即畏死自守不敢復出下情難申今得見經略大人如見天日惟哀籲赦宥永戴

皇上如天之仁此後不敢復蹈前轍并懇大人賞給

印牌如有受屈之處得赴地方官告理不為衆  
土司阻格臣傳恒諭以今後惟宜遵奉

國法無得再生事端喚令至前手授賞賜之物即  
膝行前來領受叩謝繼則郎卡率衆泥首帳前  
倉皇震恐臣傳恒責以抗拒之罪並諭以

朝廷既赦爾等必不加誅郎卡隨俯伏叩首臣傳恒  
見其係一少年喜事不安本分之人因諭以此  
番蒙

朝廷格外曠典汝幸得寬宥嗣後倘不安靜致生事  
端煩我再領兵前來汝即不能似此相見矣郎  
卡聽聞此語恐懼無措臣隨亦加賞賚又據莎  
羅奔等獻古佛一尊銀萬兩臣傳恒受佛却金  
該土司不肯收回票云此銀恭獻經略大人如  
獻與達賴喇嘛一般蓋明其誠敬之至也臣再  
四曉諭據票大人既不肯受我等應將此銀為  
經略大人建益生祠受降事畢臣等各回本營

莎羅奔郎卡復焚香跪送其時天色晴朗和氣  
薰蒸將士民番觀者如堵莫不歡慶臣傳恒於  
初六日起程回京其陸續班師各事宜交與臣  
傳爾丹等辦理竊念臣傳恒奉

命來營仰仗

皇上德威遐播視師匝月兵不血刃而賊已革面傾  
心

天討既伸

仁恩遠布一切番夷罔不畏

威懷

德仰

聲靈之赫濯悅

愷澤之覃敷從此可以永靖蠻氛救寧邊徼無任欣

忭奏入

上諭內閣曰今日據經略大學士忠勇公奏報莎羅  
奔郎卡親詣軍營投順情形朕不勝欣悅此皆

上蒼孚佑

宗社貽庥有以默相朕躬

皇太后懿訓詳明有以啟迪朕志荷茲

福庇感慶實深經畧大學士忠勇公傅恒丹衷壯志勇

畧宏猷足以柔懷異類迅奏膚功即諸葛之七縱

威蠻汾陽之單騎見虜何以加茲實為國家嘉祥

上瑞前已進爵封公酬庸更無殊典所賜四團龍

補褂著祇受服用再照元勲揚古理額駙之例加

賜豹尾鎗二桿親軍二名優示寵章均不必懇辭  
至提督岳鍾琪能承經略大學士忠勇公傳恒指  
示開誠布信直造賊巢用使番酋弭耳惕息厥角  
恐後成勞懋著功在諸將右著加太子少保仍交  
部從優議叙其叅贊諸大臣及在營大臣等雖前  
經議叙而前後殫心宣力實屬可嘉著再行交部  
議叙自去歲之徵兵命將與今歲之決策班師初  
不意番酋畏威懷德革面革心一至於此固朕宵

肝憂勤事無大小先幾籌畫恰合機宜亦由經畧  
大學士忠勇公傳恒秉心中忠亮克承訓示成此殊  
勲可見作善者昌將來數十年贊化調元懋襄邛  
治實嘉賴焉其傳諭諸王滿漢文武大臣並宣示  
中外知之

臣等謹按用兵之道攻心為上良爾吉者金  
酋之腹心也倚為內應益肆負隅經畧抵營  
首即按法加誅羣情歡悅賊徒解體如綽斯



甲向與金酋狼狽為奸前此檄召不至今則  
不招自來金酋見羣情不附大兵雲集加以  
食用匱乏人心渙散是以惶懼無措哀籲乞  
降當是時軍威不振功已垂成不惟經畧身  
膺督師重寄專意掃穴犁庭即凡在行間孰  
不欲執馘獻俘為功名自見之地然令乘機  
進取務使莎羅奔郎卡繫頸闕下懸首藁街  
非不大快一時而兵力雖強未免尚延時日

獸窮則攫更或走險為虞我

皇上神機默運獨斷不疑法

天地之包容明神武之不殺惟以民力之輸將士卒之  
疲困內地之撫綏為念毅然罷兵經畧大學  
士忠勇公承

命受降奏凱救寧之績垂之無窮然則決策破奸功  
在經畧而

聖德廣大

睿謨深遠則有非臣下所能思議者

聖諭所謂君臣各盡其道誠歸功於下威美不居之

至意云

是日

上又諭內閣曰今日金川奏捷之報到京甚為迅速  
臺站官員著交部議叙其馬上遞送報匣人等亦  
著該督撫查明酌量賞賚是日策楞奏言大學士  
忠勇公傅恒已定於本月初六日起程一切軍

務俱已一一指示交臣接辦臣初至邊境雖尚未備悉番情現在留心體察復與提督岳鍾琪細加講求知番性本屬難馴每因睚眦之忿即起爭端或親族之微嫌或疆界之錯雜互相傾陷至於仇殺攘奪數十年不解臣等惟有悉心調處示以誠信務陰消牙蘖之萌而不強之以所不欲使之競心漸平咸知畏威懷德則化外番酋自必永久恭順可以仰副

皇上懷柔遠裔之至意現在撤兵之事及一應兵糧火藥器械軍裝俱一面妥商辦理隨時奏

聞俟有就緒臣即星赴成都蓋此時外番之綏輯猶易而內地之經理甚難川省吏治民風積習難挽官則疲玩已極民則凋敝不堪茲蒙

皇上委任隆恩務必殫心竭力以察吏安民為首務固不敢稍有瞻徇亦不敢急切求效惟有審其緩急次第整頓期於一二年內盡滌頽風以紓

聖主屢念於萬一奏入

諭曰卿所見亦得其大端矣甚善甚慰加意為之

癸巳

上諭內閣曰金川大兵奏捷番衆歸誠皆蒙

列祖

皇考在天之靈默佑朕躬致此嘉慶理宜展謁

陵寢以告成功擬於三月十三日啟程恭謁

孝陵

景陵禮畢即由馬蘭峪前往易州恭謁

泰陵一切應行事宜各衙門照例敬謹預備

甲午軍機大臣等奏言伏見金川軍務告竣

天威遐暢

聖德覃敷荒徼救寧蠻氛永靖四海享昇平之福萬  
方蒙覆冒之

恩茂迓純禧仰承

神貺既昭大業合舉隆儀恭查雍正二年平定青海遣

官致祭

天

地

廟

社

陵寢載在會典今茲金川之役媲美干羽兩階允宜虔

告

神明導揚休美應遣官告祭



天

地

太廟

奉先殿

社稷

永陵

福陵

昭陵

昭西陵

孝陵

孝東陵

景陵

泰陵用薦成功以展嘉慶恭候

命下交欽天監選擇吉期一切應行典禮交內務府

禮部樂部敬謹辦理得

旨先行是日軍機大臣等又奏言金匱納款輸誠

聖恩施仁解網班師奏捷海宇騰歡臣等恭查會典

開載順治十三年題准王貝勒貝子公及大臣  
等凱旋到京次日在京王以下各官俱朝服齊  
集凱旋將軍等各具盛服候

御殿行三跪九叩頭禮

賜宴凡兵丁曾在陣前先登効力者俱令與宴又康  
熙元年議定凡大兵凱旋次日

皇上陞殿筵宴又雍正二年青海大捷經禮部奏請

於四月十五日

陞殿受賀是

陞殿賜宴向來著在彝章允為鉅典此次金川告捷

永靖蠻氛

盛烈豐功超越千古誠宜率循

令典肇舉隆儀展臣子

慶賀之忱慰朝野歡欣之願據經畧大學士忠勇公

傅恒奏於二月初六日班師起行計程應於三

月初九日到京伏乞

皇上即於初十日

陞殿經畧大學士忠勇公傅恒率同凱旋諸臣叩謝  
天恩在廷諸王滿漢文武大小臣工進表恭

賀十二日

頒賜筵宴揚采薇天保之鴻庥普飲至策勲之

渥澤光昭典禮慶洽輿情則太和翔洽於寰區嘉慶

交孚於堂陞矣

諭曰金川告捷邊徼敕寧大學士等查照會典奏請  
陞殿受賀此次膚功克奏番酋向化革心仰賴

上蒼福佑

宗社鴻庥朕何敢自以為功現經蠲吉謁

陵並依典禮遣官祭告但從前青海平定

皇考世宗憲皇帝俯允廷臣之請曾經舉行朝賀典禮  
具有成憲其勉從所請一切禮儀該部查例具奏  
是日軍機大臣等又奏言鴻功懋著宜焜耀於

簡編駿烈丕昭必刊垂於金石欽惟我

皇上

允文允武

乃聖乃神

普庶類之生成澤周海寓

統萬方而撫馭化洽寰區頃以金川土酋侵擾番

衆用申撻伐以儆愚頑乃緣經理遷延以致膚

功未奏

皇上赫然斯怒再整六師爰

命重臣授以方略霆驅電掣霧集風馳叛黨伏辜堅  
礪立碎旌旗氣肅則草木皆兵士馬歡騰則山  
川失險賊酋膽落番衆魂飛我

皇上宏一視之仁開三面之網憐其窮蹙憫彼愚冥  
既悔罪而抒誠遂蕙憐而並載經畧大學士忠  
勇公傳恒仰承

廟算遠布



皇威集益廣思殫心竭慮登臺發令覩番部之心傾  
却驢受降解賊酋之面縛軍踰雪嶺纔及三旬  
捷奏甘泉未逾八日此元臣之顯績實由

聖主之德威允宜刻石紀功昭示萬世臣等謹按雍

正二年

世宗憲皇帝平定青海

特允廷臣之請

御製碑文建立太學與

聖祖仁皇帝平定朔漠碑文並垂永久今我

皇上承烈顯謨能邇柔遠寧謐荒徼綏靖蠻氛

聖聖相承後先一揆伏乞

親披睿藻永勒貞珉樹之成均頒於黌序則

皇猷之允塞式於九圍

聖武之光昭垂諸奕葉矣得

旨允行是日

上諭內閣曰辦理金川軍務以來軍機處行走官員

甚屬龜勉供職著分別等次交部議叙其隨經畧  
大學士忠勇公傳恒辦事未經議叙之沈作朋常  
亮富顯程燾並隨尚書舒赫德出差之三寶著一  
并交部議叙

丙申

上諭內閣曰金川平定振旅功成當朕運籌決策宵  
旰焦勞之際仰賴

聖母皇太后慈訓詳明愷惻至再至三啓廸朕心得以

有所遵循竣茲重務生靈蒙福邊徼永寧其祇告  
成功應行典禮悉皆諏吉次第舉行敬惟國有大  
慶歸美

尊親矧茲蠻服之廓清實本

慈憐之

聖教宜循令典恭上

徽稱前者仰蒙

聖母皇太后懿旨於本年四月內冊封皇貴妃攝六宮

事今逢嘉慶適遇吉期晉

顯號之加隆奉

璇宮之欣豫應行一切禮儀該部詳悉具議以聞是日  
上又諭內閣曰金川奏凱大功已成而始事之輕遽  
則紀山究難辭責至於班第固係專辦糧運而其  
奏請重臣督師居心亦不可問其二人情罪雖與  
訥親張廣泗有間未便以張廣泗之例處紀山以  
訥親之例處班第然均屬有過無功豈可置之不

論今若槩從寬典仍令回京或授為副都統侍郎之職伊等亦有何顏與在廷諸臣同列班行且返衆自問諒亦難安而衆人見紀山班第之負罪重而受罰輕惟思巧圖僥倖苟免自全實無裨益於國事朕思紀山曾經駐藏班第亦微諳夷情俱著賞給副都統職銜自備鞍馬紀山前往西藏調回拉布敦辦理部務班第前往青海調回衆佛保來京另用如此則既開其自新之路亦足以警戒將

來朕於臣工功罪賞罰一秉大公至正從無絲毫  
假借亦無絲毫容心紀山班第現有經手事宜尚  
須留辦著總督策楞酌量俟伊等諸事完結即令  
由川起程各赴駐守之地

己亥經略大學士忠勇公傅恒奏言金酋乞命  
臣遵

旨受降班師自卡撒軍營起程沿途經過臺站處所  
即有內地商販人等焚香跪送及抵陶關經耶

灌等邑直至成都一路見民情踴躍欣喜比戶  
供設香燭里閭之民拜跪與前臣面諭爾等百  
姓自用兵以來背負軍裝輓輸糧餉未免勞苦  
皇上極加憐憫屢

頒恩詔垂賜賑恤緩征錢糧今撤兵之後各宜務農  
力穡安分守己共享太平無負

皇恩浩蕩優恤爾等厚意百姓咸稱

皇上撫恤我等感激無涯中心歡悅願祝



天子萬年雖僻處鄉隅者皆扶老携幼夾道跪迎數  
十里間歌頌之聲不絕於路及至省城署前見  
有搭臺演戲者臣隨詢撫臣班第藩司高越等  
諭令即速拆臺止戲皆云自伊等出郭迎臣之  
後地方百姓樂於慶賀太平衆情歡豫禁阻不  
得倘過拂其意轉致含怨是以祇可聽其歡樂  
因在臣署前鼓舞歡暢直至二更又為臣製萬  
民傘並欲建生祠緣一時未及先設長生祿位

附供諸葛祠中臣伏思金酋蠢動妄支煙臂大  
兵壓境懼罪求降臣奉

命出師銳意勦洗蒙

皇上好生之仁如天之德休兵息民羣情悅豫如此  
此皆仰賴

皇上洪福之所致而蜀地民心醇良易感亦於此可  
見將來總督策楞遵

旨留心培養加意撫綏川民感戴之忱當益深無既

矣奏入

俞旨報聞

臣等謹按罷兵之後蜀民歡悅感慶至於如此此實出於中心之誠然非可強而致也益見我

皇上神謨勝算息事寧人使民忘其勞而益戴其德誠為遠大之計至當不易以視曠日持久取必於俘馘者其功效之大小廣狹誠不可以

同年而語矣

庚子軍機大臣等奏言恭查

聖祖仁皇帝實錄康熙三十六年七月乙未以平定朔

漠遣官告祭

天

地

廟

社

諸陵同日遣官告祭

仁孝皇后

孝昭皇后

孝懿皇后陵次日遣官告祭

先師孔子今金川平定應於告祭

天

地

廟

社

奉先殿

諸陵之日遣官告祭

孝賢皇后几筵次日遣官告祭

先師孔子恭候

命下交所司衙門敬謹辦理得

旨允行

壬寅岳鍾琪奏言撤兵之後卡撤大營現存米

麵一萬二千二百餘石不但不能運回內地即運至小金川崇德地方每日以千名運夫計算五日一回尚須四個月方能運完臣等再四商酌各番離營遙遠雖經奉

旨酌量賞給亦覺負運為難惟小金川尚屬相近查自用兵以來續派該土兵二千八百名在營一年零九月尚屬出力且該土司地方值金酋踪躡之後久廢耕作擬賞糧米七千石半為補給

坐糧之用半為

皇恩賑賞之需聽其自行背負以省錢糧又駐劄大  
營一帶均係金酋地方三年未得耕種各寨待  
哺數數鵠面鳩形屢向臣等求乞若大加賑恤  
固非衆土司之心然不量為周濟亦非所以推  
廣

皇上胞與為懷一視同仁之至意謹擬賞米一千石  
以濟窮番餘米數千石留給現在兵丁夫役及



運費脚價俟大軍全撤尚有餘存即分賞隨行  
漢土兵丁彙冊報部奏入

報聞是日策楞岳鍾琪會奏言金酋納款乞降遵依  
六事內有呈繳器械砲位及送還內地人民縛  
獻兇首等項茲於初七八等日獻出九節砲三  
位鎗三百九十六根雙手帶七把腰刀六十二  
口鎗一把鏢子頭四十箇砲礮二箇又送還搶  
去雜谷等處番民二十名官兵八名臣等將所

獻番民訊明各土司所屬分別收領官兵押發  
原籍不許入伍刀鎗等械酌給新募兵丁以為  
差操之用餘存各件與砲位分別運送成都又  
據縛獻馬邦作惡頭人郎多阿朗到營力言此  
係起禍之源請於番衆前正法洩忿臣等當委  
馬良柱驗實並非假冒而該犯自知必死久斷  
飲食各頭目又堅請如前臣等伏思與其令該  
犯全尸道途不如俯允該酋所請當衆梟示以

彰

王法隨公同傳集官兵於土兵聚集之處將郎多阿

朗斬首梟示訖奏入

上諭該部知之

平定金川方略卷二十四

欽定四庫全書

平定金川方略卷二十五

二月癸卯舒赫德兆惠班第會奏言大兵既撤  
從前一切軍需支用銀米<sub>臣</sub>等現在遵

旨清查其部撥及各省協濟銀兩倘有餘存應行核  
計茲據署布政使高越冊開金川用兵以來川  
省舊管新收共軍需銀七十七萬二千九百餘  
兩部撥及外省協濟已解到川省銀八百七十

九萬一千一百餘兩共銀九百五十六萬四千  
餘兩現存銀一百五十萬三千餘兩據該司冊  
稱軍興以來借動司庫及各府廳州縣酌留存  
貯銀五十七萬一千餘兩尚未還項臣等伏思  
酌留封貯之銀原以備地方緊要之需不可久  
缺應即於前項餘存銀內照數撥出還項尚餘  
存銀九十二萬一千餘兩現在應付回兵水陸  
船隻夫馬在在需用又有從前雇馬雇夫運送

米石置備鐵斤草料等項均應找給價值又出  
師官兵應需賞恤自應遵

旨寬裕留備查各省尚有奉撥未到銀兩內長蘆三十萬兩昨已解到連現在收貯銀共一百二十萬一千餘兩應請將一百萬兩留備前項軍需支用尚餘銀二十三萬餘兩查川省本年額賦奉文緩徵且係臨邊要地而爐藏各站歲有供應寧使多備無缺應再撥銀一百萬兩以備

歲需之用除將山西解到銀三十二萬兩照數收貯共銀五十五萬兩尚少銀四十五萬兩請於近川之湖廣起解銀八十萬兩內委官持檄往迎解員截撥以足一百萬兩之數其餘江浙等省未到銀二百餘萬兩如未出境者仍令解回本省歸款已經出境者皆令於所到省分就近截收至山西尚有未到銀五十萬兩必由西安前進西安庫貯無多現資隣省接濟應將此



項銀兩全數留陝無庸再解來川似此酌量截收既省沿途腳費又於各省有濟仍將收過銀兩造冊具題並行令各該省將解回本省及截收某省銀兩數目造入季冊報部查核奏入

上命軍機大臣會同該部速議旋經議覆於江浙等省未到銀二百五萬兩內撥銀四十萬兩以補陝省酌留之數再撥三十二萬兩以補甘肅備貯之數餘俱照原奏奉行

甲辰策楞岳鍾琪會奏言征勦金川派調土兵  
一萬按照舊例每名賞給行裝銀五兩每月支  
安家糧餉銀一兩一錢一分五釐今臣等詳加  
自派調以來各土兵內有僅領數月坐糧或支  
一半行裝銀兩而全未支領者甚多出師二載  
核算應領銀數尚須二十餘萬因思現在各路  
軍營積存不能運回之米石欽奉

諭旨令臣等酌賞出力土兵莫若即查明各土兵應

領銀數除離營甚遠之裡塘巴塘十二部落等處不願領米者仍聽照例由地方官請領銀兩其餘近營各番即以此項米石按照各營折色定價扣算給發令其自行背運如有餘剩再遵旨分別賞賚約可節省十餘萬金臣已現在通飭照此辦理奏入

俞旨報聞

丁未

上命軍機大臣等傳諭經略大學士忠勇公傅恒總督策楞尚書舒赫德總督尹繼善曰川省馬匹協撥購備為數頗多大兵回營之後所餘之馬除補營驛缺額之外其尚可餵養者未便全留該省徒費飼秣經略大學士忠勇公傅恒雖奏稱馬多疲乏然亦未必悉不堪用官兵由成都回陝者逐漸經過則馬匹亦逐漸餘剩自宜預為之計若此時不行捲站之法兵過馬留勢必又須派夫趕送轉

多煩費可傳諭舒赫德策楞令將餘剩之馬按站  
捲回即交陝省存留以補缺額縱不無疲瘦而大  
差既竣加意餵養自可備用較之另行動項購買  
者猶屬省便並傳諭經略大學士忠勇公傅恒總  
督尹繼善知之是日

上又命傳諭經略大學士忠勇公傅恒曰據策楞奏  
稱莎羅奔郎卡感朕宥死之恩選進番童番女各  
十名代伊等服役已專差送赴經略大學士忠勇

公處又現在刮耳崖修建祠宇供奉經略大學士  
忠勇公長生祿位兩酋此番向化實出至誠但伊  
等更生固朕曠蕩之恩亦由經略大學士忠勇公  
傳恒忠誠辦理之所致生祠自應聽其建立至番  
童番女理不當留已令總督策楞量加獎賞可傳  
諭經略大學士忠勇公將所送幼番即發還成都  
交策楞傳令該酋領回是日

上諭內閣曰原任總兵任舉奮勇捐軀前經加恩優

卹廕子今伊子任承恩來京謝恩召見之時看來  
頗堪上進但年齒尚幼著暫行回籍令伊祖伊母  
善為撫養教導俟成立後來京當差聞其家道貧  
乏著賞銀五百兩交伊母為養贍家口之資並傳  
諭巡撫阿里衮留意照看是日策楞岳鍾琪會奏  
言莎羅奔郎卡悔罪輸誠蒙

皇上天恩網開三面貸以不死自茲以往該酋自必  
畏威懷德安分守已永靖蠻烟但犬羊之性靡

常防範之方宜預查逼近金酋之上司地方周圍環繞有雜谷綽斯甲革什咱巴底巴旺小金川等處雜谷地廣人衆金酋不敢生心綽斯甲本屬姻親亦未必與之搆釁惟革什咱巴底巴旺小金川沃日等處勢孤力弱從前金酋常懷兼并之心今若不為未雨綢繆之計恐日久別生事端亦未可定臣等擬於卡撒兵糧盡撤之後暫駐小金川駕馭各土司諭以聯絡聲氣共



相和好為合從之計過窺伺之機庶防微杜漸  
邊釁可以潛消矣奏入

諭曰甚是惟應使番部自為藩籬使我聲息常通亦  
祇可如此而已

三月庚戌

上諭內閣曰前因金川軍務奏報往來關係緊要特  
命增置臺站設立牌單稽查果能迅速馳達復經  
兵部特派司官八員筆帖式八員專司收發晝夜

在署輪值又派差官十二員往來遞送晨夕馳驅  
無愆晷刻均屬黽勉勤勞今軍務告竣臺站人員  
已邀議叙其兵部辦理臺報司員筆帖式差官等  
著一併交部議叙

壬子經略大學士忠勇公傅恒奏言臣自成都  
入陝途中連次遇雨麥田茂盛今自西安至同  
州一帶入山西境麥莖加長蔥薥可觀有數寸  
至一尺者皆緣去冬得雪土膏本屬滋潤而今

春又有雨澤近日所得之雨更為深透臣所至  
之地百姓俱言今春麥熟最好目下晴霽十餘  
日後再得微雨一次麥秋定必豐盛即此後不  
復得雨亦可決其有收衆口一辭咸謂數年以  
來所未有民情實為歡慶臣不勝欣喜蒲州一  
帶偶因荒歉民食艱難仰賴

皇上加恩賑恤不至失所今麥苗可望大熟民氣已  
甦將來接濟不缺尤可稱慶奏入

諭曰實可慶慰京師昨夜又得寸餘膏澤實從來所罕遇也

臣等謹按是時金川平定經略班師途次陳奏之詞不言軍旅惟及民事蓋當前此軍需旁午之時我

皇上諄諄以民依為念是以大學士傳恒道路所經耳目所遇凡地方之雨澤閭閻之情形無不極其留意詳悉入

告以慰

聖懷蓋所以仰體

聖天子如傷若保之懷而我

皇上之誠心為民念念不忘稼穡益可見也

癸丑

上諭內閣曰經略大學士忠勇公傅恒因朕賞給四  
團龍補服具摺奏謝並請於朝賀大慶之日遵旨  
服用其尋常仍服公品級補服此固出自大學士

忠勇公傳恒謙冲本意然朕此番獎賞實出至公  
且具有深意不可不為明晰宣示蓋論大學士公  
傳恒平定金川之功自不可與揚古里額駙開國  
之勲並論但彼當開創四征之初今屬守成無事  
之日以大學士公傳恒之忠誠智勇練達宣力令  
與同時同事亦必能懋建殊勲可信其易地皆然  
也夫軍旅之事國家不能保其必無大臣身係安  
危為社稷所倚賴如張廣泗不過封疆大吏其人

亦不足論至訥親爵位既崇又任用有年朕之加恩超越儕輩上年命以視師實寄以心膂如朕親行不意辜恩貽誤一至於此為大臣者若惟事偷安自逸任意乖張國事其何賴焉朕既用以自愧更因以滋懼是以明正刑章不肯曲宥而大學士公傳恒見朕縈懷西顧毅然請行仔肩重任自奉命西征冒涉風霜均勞士卒步陟巖阻晨夕辛勤拜發封章裁決軍務常至達旦事事妥協周詳至

則申明紀律誅賊腹心雪夜督師攻碉毀卡必期  
焚巢掃穴一舉蕩平大振聲威賊番震懼始稽顙  
歸命出於至誠迨承朕旨納降班師星馳就道諮  
詢庶務仍係丙夜辦理奏覆此所謂誠貫金石信  
格豚魚是以時未七旬兵不血刃而番酋洗心革  
面永矢歸誠現據策楞等具奏守備王如林前往  
黨壩夜過勒歪馬上遺失衣裝為番民拾取次日  
莎羅奔專差送還即此一端足見威信感孚叛番



恭順之實效從此邊徼救寧閭閻樂業而中外大  
臣咸知所取法股肱一體休戚相關夙夜匪躬緩  
急足資倚任實我大清萬年無疆之慶國家酬庸  
盛典原非朕所得私今茲疊沛殊恩昭示風勸亦  
為朝廷遠大之計不僅為金川平定一時一事而  
然在大學士公傳恒實應欣承無愧不然則莎羅  
奔番蠻小醜即迅奏膚功亦與當年岳鍾琪之樹  
績青海大學士鄂爾泰之綏靖苗疆等耳朕於臣

工賞罰大典悉有權衡銖黍不爽天下臣民宜所共悉所賜大學士公傳恒照宗室公式之朝帽頂及四團龍補服並於朝賀典禮之時時常服用不必懇辭其尋常入朝入部辦事應從所請隨宜即用公品級補服以成謙挹之美是日大學士來保奏言經略大學士自京起程之日

特派諸王大臣率令侍衛等於郊外餞送今班師凱旋抵京之日似應仍

派諸王大臣於郊外迎接護將王公及文武滿大臣  
等列名進呈

御覽恭候

欽定

上命色布騰巴爾珠爾查拉豐阿於初八日隨大阿哥  
前往迎接裕親王履親王誠親王恒親王奇通阿哈達  
哈豐安弘凱羅布藏色貝趙宏恩那木圖特庫阿岱李  
元亮海望德通德齡介福三

和馬靈阿雅爾圖勒爾森於郊外迎接是日策  
楞岳鍾琪會奏言從前臣岳鍾琪臧撤土兵召  
募新兵千有餘名又陸續召募二百九十餘名  
頗稱勇銳除已經頂補及病故傷亡外尚有無  
缺可補之新兵一千五百餘名茲值大兵凱旋  
一切坐餉行糧俱經停止新兵均屬無糧可支  
若不亟為仰懇

聖恩不獨疆場効力不獲仰邀收錄以勵人心且若

革俱係各省游手好閒之徒一旦失所流落西  
蜀於地方亦非所宜臣等再四籌酌惟有仰懇  
皇上天恩暫准賞給守糧容臣等抵省後即分發通  
省協營統限以到營後半月內將各營老弱不  
堪充伍者秉公裁汰即以新兵抵補庶為日無  
多不致虛糜糧餉而新兵可免失所營伍又得  
收精兵之效奏入得

旨允行是日策楞岳鍾琪又會奏言撤兵後各營所

存之米多寡不一少者僅足數用多者既不能  
運回內地若概行賞給亦屬可惜茲查土兵中  
陣亡病故者尚有一千七百餘名帶傷者二千  
二百餘名例應照內地兵丁折半賞給約需銀  
四五萬兩似應將此項米石一體扣算折給以  
省錢糧惟是賞恤定例應自外省查明報部由  
部核題奉

旨始得辦理未免時日甚遲米石無人看守再懇

聖恩准<sub>臣</sub>等即在外查明土兵傷亡等第確數按照

部例先行以米扣抵報部核銷其距糧務路遠或不願領米者仍照舊例造冊報部核辦奏入得

旨允行是日策楞岳鍾琪又會奏言卡撤軍營應運回內地糧餉軍裝砲火鉛彈等項甚多糧運停撤無夫可覓若於遠處雇覓又致靡費錢糧隨商令漢土官兵分臺遞送即將卡撤餘存米糧

酌量賞給鼓勵茲已全數運出金川地界其西  
安成都滿兵俱已起程陝甘雲貴綠旗兵丁亦  
已出金川境護軍統領烏爾登法副都統盧  
色力等俱於二月十三十六等日報到起程日  
期臣策楞於二十二日前赴小金川美諾地方  
臣岳鍾琪亦即前往建昌鎮馬良柱松潘鎮哈  
攀龍帶領川兵殿後彈壓約於二十五日可全  
出金川地界自凱旋以來迄今半月金酋已遣



頭人在營供應夫馬而窮番來營拾取我兵遺棄不堪物件者絡繹不絕俱有頭目管束極為安靜奏入

### 俞旨報聞

甲寅經略大學士忠勇公傅恒奏言臣於初四日自山西平定州入直隸界內察看情形須得雨澤乃辰刻至獲鹿縣地方即遇天降時雨申刻方止約可二三寸不等一路春膏融洽行至

正定百姓爭先出迎歡聲載道俱云十餘年來  
無此應時好雨臣問此後尚須雨澤否據云目  
下即不得雨亦無妨碍麥秋決可豐收臣觀此  
雨實屬有益農功謹此附奏奏入

諭曰京師亦甚霑足實同欣慶也

乙卯

上諭內閣曰人子報本之忱必念爾祖國家酬庸之  
典爰及所生大學士忠勇公傳恒夙夜宣猷贊襄

機務前因金川番蠻不靖丹誠奮發自請督師朕  
以其世篤忠貞服勞王家鍾慶椒塗聯輝懿戚悉  
由乃祖乃父積厚流光誕茲良弼陞辭之際朕欲  
加恩賜之祠堂秩於祀典大學士奏稱臣仰蒙高  
厚榮貴先人實出至願如果憑仗天威肅清荒徼  
凱旋之日擬當懇請殊恩今威信遠孚番酋效順  
膚功克奏績著旂常宜考懿章以示優錫其照熙  
臣額宜都佟國維之例勅建宗祠春秋致祭增光

俎豆用獎忠勲該部即遵諭詳議具奏

丁巳經略大學士忠勇公傅恒還

朝是日

上諭內閣曰金川平定邊徼救寧大學士忠勇公傅恒凱旋陞見奏稱是役臣雖勉効馳驅而番酋歸命悉仗天威至於歷練戎行信孚蠻部深入賊巢膽勇雄決則岳鍾琪洵為克勝委任此固出於大學士公傅恒之讓能推美然岳鍾琪之奮往任事

實屬可嘉前已降旨晉階太子太保交部從優議  
叙伊前於青海奏捷曾封公爵茲復樹績蠻方收  
桑榆之效著再加特恩授兵部尚書銜於本身封  
為三等公以昭錄功懋賞之典俾宣力疆場者知  
所勸焉

臣等謹按語曰師克在和信哉是言也觀前  
此訥親張廣泗之彼此牴牾卒致債事及大  
學士傅恒泣營羣臣輯睦庶務修舉抑觀其

凱旋復

命即讓能推美於岳鍾琪則在軍之虛已和衷廣思  
集益可知是誠能仰體

聖衷宜乎克副委任而為人臣者亦當知所法戒矣  
是日大學士忠勇公傅恒傳

諭曰十二日筵宴隨大學士前往之軍機處官員及  
在京辦理軍機處行走官員俱著入宴

戊午

上御太和殿受羣臣朝賀是日

諭內閣曰朕賜大學士忠勇公傅恒四團龍補服先  
經大學士公傅恒奏請於朝賀大慶之日遵旨服  
用尋常仍服公品級補服朕諭以入朝入部辦事  
姑從所請以成謙挹之美今日朕陞殿禮畢後大  
學士即易補服朕思章服之榮原以旌有功而勵  
臣節從前勲舊大臣蒙賜者皆時常服用若僅用  
於朝賀典禮之時而尋常入朝又旋易本爵服色

殊覺參差非禮嗣後入朝著即遵前旨時常服用  
其入部及在家聽其自便以終成大學士之謙吉  
蓋朕之加恩初不為大學士一人且不為其一時  
一事立功而然如以功而論較之開國元勳自有  
不及而其忠純堅定之心則一是以能感格

上蒼諸事順遂完美而威信所孚番蠻向化且金川不  
過么魔小醜即俘馘其首殄滅其衆亦無關輕重  
惟是從前張廣泗既非張貪貪縱不肅軍紀因特命



訥親前往更不料其毫無實心惟安逸是耽傲慢  
自恣番蠻初聞特遣重臣意其必有過人之略乃  
見其所為如此將謂中朝大臣舉皆相似其貽笑  
外番可勝言耶今大學士公傳恒自奉命以至抵  
營本精白自矢之忱殫夙夜匪躬之誼歷艱險而  
逾壯誅奸宄而不疑用是威懾羣番信孚異類革  
心歸命一出至誠俾向日之見輕蠻服玷辱班聯  
者盡為湔洗實足稱國家倚任於朕顏面有光即

九二  
舉朝大臣亦大為增色朕因此益信

天人感應之理惟在一心其有心作偽者天討必不能  
逃而立心中忠實者天休必所嘉佑我君臣當善承  
天意交修罔懈庶幾亮工熙績海宇乂安為我大清永  
奠丕基垂慶無疆之至計也著宣諭中外知之

己未

上諭內閣曰大學士公傳恒奏稱軍營隨來之叅將  
吳士勝家有老親道遠難於迎養吳士勝著以近

省叅將補用是日

上又諭內閣曰訥親於從前金川軍務支用養廉及濫賞建碣等費經戶部題明著賠續據尚書舒赫德查奏訥親濫用冒支銀米均應著落伊兄弟名下追賠朕以策楞辦理諸務實心實力坦白自將毫無觀望加恩免其賠繳令愛必達阿里衮按年交清今思巡撫雖有養廉而應辦公事亦多設措賠項未免拮据朕念伊等祖父曾為國家効力況

弟兄罪不相及愛必達阿里亥應賠銀兩著一體  
寬免此朕格外之恩伊二人更當殫心職業力圖  
報稱如稍有疑慮因循不克勉矢真誠不能逃朕  
洞鑒也

庚申

上幸瀛臺賜羣臣宴出征有功兵丁皆與焉

辛酉

上謁

陵駕發京師是日

上諭內閣曰從前任舉奏請帶往金川之千總傅德  
把總晁宗志俱著照伊職銜留川補用

平定金川方畧卷二十五

欽定四庫全書

平定金川方略卷二十六

三月壬戌軍機大臣等奏言總督策楞等以金川平定籌酌善後陳奏事宜十二條臣等謹按款分晰詳議恭呈

睿鑒策楞等稱巴底巴旺宜各立土千戶一員責令革什咱管轄以助聲勢臣等議得巴底巴旺地方原係土司納旺所轄納旺係金川之壻是以

從前張廣泗將伊圈禁爐地今策楞等以該處  
現無土司請將納旺之姪勒兒悟爾結噶杜爾  
結改給土千戶職銜平分其地令革什咱兼管  
臣等伏思莎羅奔郎卡既已邀

恩免罪則納旺尚非不可寬宥之人且伊現無子嗣  
伊姪又年幼無知遽將巴底巴旺之地分給革  
什咱管理是無端為革什咱增益部落既不足  
以服番衆之心且恐勒兒悟爾結等長成之日



革什咱占地不還輾轉滋釁似應將納旺從寬  
釋放予以自新仍令為巴底巴旺土司伊姪成  
立之後亦可聽其以次承襲仍令該督策楞宣  
布

聖恩俾知感激奮勉似屬妥協但策楞等身在地方  
於情形較為親切或所奏別有所見亦未可知  
應令詳悉酌量再行具奏以便定議策楞等又  
稱革什咱之札什諾爾布應請即予承襲以資

彈壓臣等議得土司承襲之例向係該管地方官層次加結文移往返動經歲年今金川新定革什咱地界與之毗連亟須土司整理札什諾爾布既係應行承襲之人且自用兵以來頗能効力自應照策楞等所請先行給與號紙以示獎勵而資彈壓策楞等又稱雜谷革什咱沃日小金川四土司宜聯為一氣以防外患臣等議得雜谷等四土司俱與金川接壤向因勢弱人

懦屢被金川侵占今既歸還侵地自可息事寧人即或思患預防亦應聽該番等自為籌畫但既據該督等傳集曉諭令伊等頂經發誓則是辦理已經完結可以無庸另議策楞等又稱小金川沃日宜結為婚媾協守疆圉以杜金川窺伺臣等議得沃日地方向係土女澤爾吉管理今該督既稱衆土司會議將澤爾吉配與小金川澤旺事屬已行應無庸置議策楞等又稱沃

日印務應請仍令澤爾吉護理臣等議得沃日印信原係澤爾吉管理今雖配與澤旺自應仍令執掌以便約束該處番民至將來承襲之事應俟其生有子嗣即照明正土婦功噶之例分襲兩土司印務可也策楞等又稱小金川各要害處所被毀碉房宜督催修葺孫克宗占固二處宜駐土兵防範以備不虞臣等議得碉房之設原係各該土司自為防禦其已經殘毀者自

應聽其自行修葺至孫克宗占固既係小金川  
要隘則設兵駐守亦應任該土司自為料理若  
委員督催分派轉似代該土司防範莎羅奔等  
未免轉生疑懼此事倘尚未舉行應即行令停  
止策楞等又稱小金川之大小朗素宜分別安  
插以杜後患臣等議得小朗素現已奉

旨令策楞等詢問辦理無庸置議至大朗素秉性奸  
頑又無効力之處原非小朗素可比其應如何

設法安插應令該督酌看情形妥協籌辦策楞等又稱金川投誠之土舍汪爾吉應行暫為安插臣等議得該土舍原係郎卡異母弟兄當金川起事之初即不敢同惡相濟來營投誠効力亦屬可嘉今金川事竣不能回巢自應代為籌畫伊現在留養革什咱地方應照該督所奏即交伊母舅土司札什諾爾布帶同駐牧俟有可以安插之處另行奏請辦理策楞等又稱梭磨

竹克基黨壩各土司土舍宜加銜獎勵以分雜  
谷之勢臣等議得梭磨竹克基黨壩土司向皆  
受制雜谷金川用兵以來伊等從征効力又皆  
係隨從雜谷土司今遽將勒兒悟等加銜給印  
在梭磨土司等固為喜出望外而率先効力之  
雜谷土司既已恩無可加轉將伊向所統轄之  
地瓜分鼎峙相形之下彼此俱覺難以相安應  
令該督等另行籌辦請

旨定奪策楞等又稱各土司應請加級以示鼓勵臣  
等議得金川用兵以來各該土司派調目兵輓  
輸供應運餉從征甚屬勤勞恭慎大兵奏捷之  
後業蒙

恩旨令該督等酌加賞賚今既請賞加一級以示格  
外獎勵事屬可行應請

旨交部辦理策楞等又稱漢奸出入番地應行嚴禁  
臣等議得番夷愚魯無知諸事多由漢奸藉端



煽惑原應嚴為防範但勢有難行前經奉

旨傳諭該督等令其設法稽查善為酌辦茲各土司

皆有錢穀文移之事必須倩人代理在伊等自

為延致則去留各得自由若如該督等所奏附

近內地之各土司等延請代筆必由地方官取

結詳報備案則地方官所辦公事甚多安能復

為土司延請幕賓即令加結詳報不過增一具

文故套未見實益至於願充土司字識之輩必

非安靜守法之人地方官又安能選擇謹愿馴良者以充此役而此輩倚恃經官選擇之勢或挾制土司益將滋事況捏飾冒充究難徧為覺察若云定以年限給以職銜將求充者益衆選擇者愈難伊等於該土司稍有齟齬或至內地告奸既不便據以為實又不便置之不問種種枝節弊難悉數應令該督等遵照前

旨督率所屬實力奉行漸次嚴密稽查不必多為禁

約至內外民番互相貿易亦難一槩禁絕惟在該地方州縣營汛稽查匪徒出入混雜以免滋事可也策楞等又稱夷人典買漢地應請贖歸以清疆域臣等議得木坪瓦寺兩土司緊接內地漢人田產典賣與夷者甚多一時難以盡數贖回且夷民管業已久遽行追贖轉似妨彼生計於綏輯拊循之道似有未協但該督所奏亦屬釐定邊界之意應請嗣後嚴禁內地民人不

得將所有田地私售番民違者酌治其罪可也  
得

旨速行

丙寅

上諭內閣曰軍旅為國家重務前因道員鹿邁祖貽  
誤夫馬自請罷斥以博里民虛譽經朕降旨革職  
治罪俾辦理軍務之員知所儆惕今大兵雖已凱  
旋而糧糈宜加保護成都府知府李盛唐係該督

等特委出口總理糧務之大員乃奉委之時即托  
病不前到臺之後全不留心防範以致軍糧兩次  
延燒又不督率查察惟思回省調理寧棄官而有  
所不惜該員當鹿邁祖治罪之後仍敢漠視公事  
罔知大義此風一開將地方政務舉可任意怠玩  
一離官守便得優游事外其居心實不可問非重  
加嚴處無以示懲李盛唐着革職拿問從重治罪

辛未

上諭內閣曰四川總督策楞等奏稱軍前餘存米石除賞給各土司外尚存一萬六千餘石已照內地賑借蕪施之例今番民承領准其分限二年易以青稞運赴威茂營還倉朕自金川納款大兵凱旋以來屢經降旨將從征出力之各該土司等加以優賞並據該督奏明各土司土目俱經分別賞給米三百石五百石不等其存留餘米無庸再為賞給但念連年用兵各該土司等恭順効力番民轉

餉從征遭荒失業情殊可憫著將領借之餘米一萬六千餘石即賞給各該土司聽其自行承領不必分限還倉以廣懷柔獎勵之至意是日策楞岳鍾琪會奏言臣等於三月十一日已抵陶關駐劄二日辦理瓦寺地方一切事務隨送各處土目臣等逐一面加教誡給賞回巢回營兵丁業俱至省陸續起程沿途並未滋事一切軍裝已委文武大員照依原發印冊逐細查點總兵哈

攀龍現自沃日一帶從後捲撤臣等可於十六日進省奏入

報聞

四月己卯策楞岳鍾琪會奏言治夷之道首在嚴密邊防臣等於凱旋時沿途留心查察知瓦寺土司出入內地向由汶川縣索橋行走彼處既有縣城又有營汛稽查甚易迨後日久法弛該土司厭此迂途別求捷徑乃於陶關以外漢



番界河之間自行建立索橋一座河南雖為夷  
疆河北本屬內地今則兩岸俱歸番人把守且  
直走成都計程不過兩日臣等親見此處相離  
營縣甚遠漫無防範隨傳詢該土司桑朗容忠  
數其私建索橋之非諭令拆毀仍由汶川舊道  
出入已據該土司認罪遵依此外尚有番地要  
隘一二處必須修理撥防者容臣等查明酌辦  
再行具奏臣等又訪得瓦寺地方素產銀礦內

地民人因陶關有此索橋遂私往開挖與該土  
司均分其利聚集至三百餘人之多臣等酌議  
概行查拿並叅處土司不特人衆難以盡罰且  
軍務甫竣正當安輯番境之時不應啟其疑懼  
是以嚴諭桑朗容忠嗣後不容再犯並將為首  
之廖安鳳等四名枷示漢番交界地方餘俱押  
逐回籍庶內外匪徒共知儆懼不敢再往夷地  
滋事奏入

俞旨報聞是日尹繼善奏言軍前回兵一切馬騾俱足應付但馳驟往來必得更番輪替庶馬力寬舒不至困乏若兵丁跟役概給馬匹則用馬過多恐難休息是以酌量兵丁皆給馬匹跟役則令折價兵役俱各歡欣遄行無誤在臺各員亦皆能竭力承辦不敢偷安現今回兵陸續行走出潼關者已有八起東省之兵俱已過完在途兵丁不過一千有餘約四月半後皆可出陝境

矣至陳宏謀咨稱臺馬有餘官兵即五百名一起全行亦可應付臣查此不過欲速之意但臺馬寧可有餘俾得更換休息若大隊同行儘數應付日日奔馳勢必中途疲乏後來之兵反多阻滯自應仍照原奏無論五百名四百名一起者皆分為兩起從容行走庶不致欲速反遲臣因陝甘事務正署疊更案牘叢積已於三月十八日回至省城次第清理奏入

俞旨報聞

甲申

上諭內閣曰金川用兵案內川省大小官員辦差辦糧小有過愆及供億滿兵遲誤者前經降旨令於事後核其功過查辦乃因現在用兵不可不使知儆惕而然今大軍凱旋伊等從前雖未免稽誤而竭蹶辦理業經竣事可加恩從寬免其叅處俾得安心職業

己丑

上諭內閣曰朕前降旨金川軍務自經略大學士忠勇公傅恒調度得宜勲績懋著所有在軍大臣及隨營文武官弁等與有成勞交部從優議叙此乃指大學士忠勇公傅恒上年十二月二十一日到營以後而言續據總督策楞奏軍營從前將弁功過並無文案可稽無庸查辦朕因降旨以既無冊檔則該部無憑置議官弁優叙之處自可不必此

則指上年十二月二十一日以前而言也分晰至  
為明白乃兵部及該督錯會朕意僅將從前在軍  
大臣查辦而不及隨營文武官弁等不思大學士  
忠勇公傳恒調度之員弁即係從前在軍之員弁  
當雪夜攻奪碉卡數次鼓勇血戰又如吳士勝等  
頻入賊境冒險往來及岳鍾琪遵奉大學士忠勇  
公傳恒指示直由刮耳崖帶領番酋赴營歸順則  
亦必有隨營將士俱經奮勉出力伊等前此因主

帥乖張貽誤既無由建立功績今幸得以少効微勞又不獲仰邀議敘終屬向隅且無以鼓勵人心俾將來知所勸勉著傳諭總督策楞將上年十二月二十一日以後在營自總兵官以下逐一查明造冊開送聽大學士忠勇公核定具奏一體加以優敘用獎成勞

丁酉兆惠策楞奏言乾隆十四年三月二十二二十七等日節據湖北湖南江西解到餉銀共



六十五萬兩均在臣舒赫德臣兆惠酌定

奏明截留川省銀二百萬兩之外不應收貯川庫  
但隔省往返路途遙遠不但餉銀關係緊要恐  
有疎虞即長途跋涉腳價亦多糜費臣等公同  
商酌川省歷年因額徵錢糧不敷支給歲需他  
省協濟自二十萬以至三十萬不等似應即將  
此銀留貯川省以抵按年協濟之項既免遠道  
疎虞又省往來糜費似屬兩便奏入

上諭該部知之

丙午尹繼善奏言凱旋京兵約於四月二十五日即可全出潼關五月十五以前計可全數抵京所過地方俱極安靜其馬騾一項仰賴

聖恩准其分起行走又准跟役折價多方體恤馬力得以更番休息不致疲乏兵丁隨到隨行毫無阻滯臣已飛行各屬將臺站捲撤民馬俱令歸農早資耕作營驛馬匹令其領回供備差搯從

此兵民安堵地方寧靜莫不歡欣額手感戴

天恩至軍需錢糧現在設立總局遴委幹員逐款細查確實另行造報奏入

諭曰軍需查核固應詳妥而軍興之後民氣之凋敝亦宜加意休息也

臣等謹按川省用兵以來

皇上宵旰勤勞大小機宜無不籌畫指示而所惓惓致意者尤在民生吏治是以凱旋之後特將

川省大小官員辦差錯誤之案槩免處分俾  
得安心職業以盡撫綏休養之道而於尹繼  
善奏報軍務告竣之摺又諄諄以民氣凋敝  
加意休息為

諭仰見

聖主之心殷民瘼舉念必及如此

五月丙辰

上諭內閣曰前因川省軍興一切供億輓輸有資民

力曾經降旨將該省乾隆十三年並本年地丁錢糧概行緩征復令該督策楞將辦過夫米各州縣於凱旋之日查明等次具奏候朕加恩今據策楞分別查奏其列在一等之茂州等一十四州縣地居衝要差務殷繁承辦夫米最多可加恩蠲免一年錢糧列在二等之溫江等四十三州縣廳辦米出夫稍次或有派往出口站夫或當北路孔道差務亦重應酌免一年錢糧十分之七列在三等四

等之州縣或糧由舟運人力稍省或辦夫而不辦米或辦米而不辦夫如樂山等二十二州縣應酌免一年錢糧十分之五隆昌等五十三州縣應酌免一年錢糧十分之三至乾隆十三年錢糧既經緩徵其中倘有急公完納之戶即照伊等完納分數仍准展限緩徵以示獎勵至本年緩徵者目今軍務雖竣民勞甫息仍令該督相其緩急毋致催督擾民如此則全蜀出力辦公之良民咸得仰邀

恩澤元氣漸舒該督等應督率所屬妥協辦理並  
出示曉諭俾閭閻均沾實惠以副朕優恤勞民之  
至意

丁卯

上諭內閣曰貴州銅仁協副將胡大勇前在軍營倡  
議制造標砲棉牌三千面據傅爾丹等請將胡大  
勇遣赴滇省監造嗣經張允隨等奏稱需費五十  
餘萬且成造難計時日物料亦無從購買萬難製

辦攬牌之有益無益及製造之所費幾何胡大勇必悉知之而後倡此議也若明知此舉之多費錢糧無濟實用而倡議製造則是有意希冀開銷從中侵冒分肥其居心固不可問如不知動項浩繁而以必不可行之事捏飾妄稟則又明係伊籍隸雲南因從征艱險巧圖規避得以藉此歸家脫身事外其與臨陣退縮者何異此在職小武弁尚屬不可而況身為副將受國重祿者哉胡大勇著革



職交與刑部軍機大臣等會同嚴審定擬具奏

八月甲午

上諭內閣曰上年調赴金川兵丁借支辦理行裝銀兩例應扣還朕念伊等長途跋涉未免拮据業於恩詔內將已至軍營之兵丁全行免扣其已經起程而中途撤回者亦寬免一半今思未經起程之兵雖未有行旅之勞但既經派調則辦裝安家等用亦不無耗費若將借支之項全數扣抵未免拮

据著加恩將未經起程兵丁從前借支銀兩寬免十分之三以示優恤

庚子

上諭內閣曰上年川省需馬之時地方官雇用民馬已經官給雇價凱旋之後又經陸續發還但其中尚有倒斃者同一應差而無馬領回未免偏枯著加恩除雇價外每匹賞給銀三兩以示體恤小民急公之意

十月戊戌

上諭內閣曰此次金川之役雜谷土司蒼旺等兄弟  
三人同心効力甚屬可嘉著加授蒼旺為雜谷閘  
宣慰司勒兒悟為拔磨安撫司娘爾吉為竹克基  
長官司各給印信以昭朕懷遠酬庸之意

乾隆十五年四月丙申

上諭內閣曰總督策楞奏報軍糈案內核減南路運  
糧烏拉應賠銀三萬餘兩並將辦理不善之撫藩

及總理臺員等開列名單著落分股追賠朕思從前南路各站供應糧石烏拉已用價採買而腳價之外又添給草乾較之雇運為數轉致浮多自應照例核減但念彼時實因明正土司等處烏拉短少雇覓維艱曾經奏明採買辦運尚非有可雇覓而故為靡費者比況倒斃烏拉本屬該員等經理無方原價自難虧項至於長途往來輸挽草乾在所必需若照雇運之例一并核減該員等賠補未

免竭蹶著將議賠草乾等項銀一萬二千餘兩俱從寬免其賠補

十月壬申

上諭內閣曰豫省供應赴川及凱旋官兵動支各項銀兩屢經該部指駁自屬照例辦理但念此案關係軍務該撫惟恐供頓貽誤一時尅期措辦遂於定例有逾並非有心冒濫著加恩准其報銷

十二月辛巳

上諭內閣曰知州謝應龍著賞給伊父封典謝應龍  
原屬微員前在沃日寨守禦有功故特格外推恩  
以示鼓勵至卡撒糧務應付紛繁非他處可比伊  
辦理頗著勞績所有應追核減銀兩若按數追償  
未免拮据其未完者俱著加恩豁免

平定金川方畧卷二十六

# 欽定四庫全書

史部

平定金川方畧卷二十七

至九

詳校官編修臣曹振鏞

編修臣裴謙覆勘

總校官知縣臣繆琪

校對官編修臣于鼎

謄錄監生臣張友柏

欽定四庫全書

平定金川方略卷二十七

藝文

御製詩

命傅恒經略金川詩以賜之

壯齡承廟略一矢靖天狼  
番部蕞爾蝥王師武必揚  
慰予西顧久嘉汝赤心良  
捷伐敕么寇撫循集衆長  
斯能成偉績用幹不庭方  
佇看銷兵氣敷天日月光



孟冬上旬於瀛臺賜經略大學士傅恒及命往  
蜀西諸將士食並成是什

大清聲教暨遐陬豈有來王稽蜀酋躋武開邊非我  
志安良禁暴藉卿謀行軍吉值初陽復賜食恩同湛  
露流轉瞬明年擒娑虜還教凱宴侑封侯

十月十三日雪得詩二首時命大學士傅恒經略  
金川月之十日召經略及諸軍士於瀛臺賜  
食天氣晴和恩流湛露朕意於數日間若得

瑞雪足為明年破金川嘉兆今未逾三日得  
雪既用占歲兼愜軍祥樂孰如之因並書以賜  
同雲未肯放冬晴凍雨均霑繼瑞靈英著地消融無定  
態隨風飄舞可憐生鴛樓有玉皆垂珮雞樹非春率  
鬪榮卜麥慰餘饒韻事竹爐文火煮三清

知時好雪值冬初破蔡明年此兆諸不數舞隨曹植  
馬所欣瑞點晉公裾評將形色清無比目極鬚髯勢  
有餘却想臺懷駐輦處松崖積翠景相如

前年幸五  
臺亦於孟

冬過  
雪

戊辰十一月初九日雪得五言古詩七韻書賜

經略大學士

伊余有宿心對雪無不喜今歲已兩逢此復勝於彼  
恰在仲冬月偶駐南海子銀句致更佳玉林花散蘼  
豈惟縱目欣為愜祈年美念我同心佐率彼諸軍士  
驅馳冒嚴寒縈懷曷能已

經略大學士傅恒舟渡蜀江賦詩呈覽用其韻

答之

若濟常殷擬巨川平羗今復率師前行旌冬發真勤  
瘁露布春傳此佇延遙度已臨滴博壘底教稍遲蜀  
江船數千里外寧睽隔心在丹楓玉馬邊

經略大學士忠勇公傅恒帥師進剿番酋忠誠  
奮發志期殄寇執奏再三朕揆勢度理以允  
降班師休兵息民為經國遠計彼匈奴未滅  
何以家為者乃粟姚貳師輩武人銳往立功

之概大學士輔弼元臣抒誠贊化名耀旂常  
正不必與兜鍪閫帥爭汗馬一日之績詩以  
示之

三面姑開格蜀夷來調說鼎佇期之集思廣益卿誠  
踐勤遠勞民我不為武豈佳兵應戒彼績惟和衆孰  
同斯功成萬骨枯何益壯志無須效貳師

己巳新正試筆書賜經略大學士傅恒

履端首祚肇昌辰斂時五福錫庶民三百六句中一

日富貴貧賤皆欣春  
春雷送響飄瑞葉  
唐花底用催三疊  
青黃布令穆其舒  
有脚韶光熙以捷  
捷轉韶光實快哉  
花牋彩筆吟興催  
東風吹西觸物回  
迅共西川凱報來

春正九日作

一例韶光同不同  
倚楹竭爾向東風  
萬幾就理心無倦  
七字成吟興有窮  
邇日邊情縈遠夢  
當春捷報賴元戎  
兩階干羽重華德  
緬想前徽遲侍中

大學士傅恒經略西川效忠宣力誅渠魁破堅壘申明紀律大振軍威番酋窮蹙乞命經略大學士銳意蕩平未允其請朕特宏解網之仁下詔班師召大學士還朝襄贊勞績茂著詩以賜之

安邊底績本丹忠請命番酋勢已窮上將有心期利執大君無物不包蒙那須一月間三捷早覺干忻達兩宮晉國勤勞予廛念速歸黃閣贊元功

歐鳥何庸盡覆巢好生天地德含包歌成宵雅八章  
句著得同人九四爻兵洗蓬婆春澹蕩首稽獫狁面  
頽顛蜀民安撫勤籌畫心契元良泰陞交

二月十四日閱經略大學士忠勇公傅恒奏報  
莎羅奔郎卡於月之五日詣轅納欵稽顙歸  
誠露布風馳歡聲載路喜而有作

止戈為武信其然我澤如春經略宣共喜捷音來玉  
闕何殊俘虜自金川番酋路左心傾服軍士行間氣



倍鮮單騎汾陽休比擬都因忠赤格

穹天

經略大學士忠勇公傅恒奏凱金川率諸將士還朝錫宴

豐澤園用昭飲至之典即席得長律一首書以賜之

卡撒功成振旅歸昇平凱宴麗晴暉兩階千羽欽虞  
典六律宮商奏采薇湛露應教頌恭殿甘膏更慶遍  
春畿持盈保泰咨同德偃武修文凜勅幾

蜀道難用李白詩韻

我聞李白所云噫吁戲危乎高哉蜀道之難難於上  
青天昔實謂信矣今乃知不然想其酒家眠起神來  
候狂歌落紙如雲烟一時遣興并寓意幾曾歷險親  
履巉巖巔我之所云則在錦城以西桃關外納窪天  
赦相延連語言之所不通人跡之所罕到於是處也  
則有邛籠以居糲粃以食之金川夜郎自大海隣部  
相與呌訕為攀援逍遙河上等遊盤使我師老棲荒  
巒告功不時烽未息宵衣旰食增愁歎予哀征夫命

相釐使我戍卒及早還度晉越秦未彌月劒閣亦復  
衝霜攀拾級宵磴幽飲馬水澌間此時頗有奏章到  
謂棧道險祇不過如塞上山蜀道非難豈真難於上  
青天太白聽此想應笑破顏番窟冰途寬不徑尺下  
臨千仞澗上倚凌雲壁以繩繫馬馬驚虓伏波硠磳  
殷其雷設非士卒同辛苦安能成功迅速歸來哉礪  
樓失其崔嵬巴郎刮耳夜戶開昔聞格豚魚今見服  
狼豺休運儲胥安避虎蛇孳爾雞豚熟爾桑麻却履

劍閣如平地凱歌士卒咸歸家蜀道非難豈真難於  
上青天迴思籌邊去歲不禁西望猶咨嗟



御製平定金川告成太學碑文

天畀我皇清握乾符俯坤軸函括萬邦悉主悉臣

五后繼承創守佑啓亦唯是二三蓋臣布德宣力予曰

有先後予曰有禦侮用造我丕丕基罔有蘖芽罔

不熙嫗長養游於大當粵有金川莎羅奔者居西

蜀桃關以外界綽斯中小金川之間向曾從征得

受符檄與諸土司齒顧恃其險遠夜郎自大構釁

隣番各土司中訴封疆吏吏曰蔓之不圖豈其視

為甌脫乃請兵籌餉期掃其穴而司其事者或怯縮以老師或獯狡以蓄志軍無適從事用弗集予心惻然念邊徼之不寧或致增防置戍重勞吾民大學士忠勇公傅恒義同休戚毅然請肩斯任乃命以經略印益厚集諸路軍芻粟相繼閭閻不驚卜吉於戊辰十一月之三日

禡牙以指所征朕親御武帳賜經略酒以行天日和昶陽氣宣復都人士聽睹聳躍罔不忭喜謂露布

之旦暮至也乃歷燕晉驅秦隴越劔閣絕川江凌  
桃關之巖經天射之峻又日討軍實而教誡拊循  
之均其渴飲飢食同其曉征夜眠至於密贊機務  
親草奏章則又經略獨勤其勞而諸武臣有所不  
知有弗能共者恩威既明士用益勵度番落如戶  
庭過部位於衽席奸酋授首軍聲大振復以巨礮  
擊其礮堅礮以摧將俟諸軍之集搗其中堅而番  
首駭瞿駭喙稽首請降經略臣以彼罪重惡極窮



而乞生久或渝且脩焉慮不允所請朕惟

天地之德在好生彼蟻潰而鼠駭者毋寧赦而宥之且  
求降而盡殲之不可謂武矧不足以汚我斧也於  
是經略宣朕明旨登壇受降己巳二月之望金川  
平定捷音至京是役也笨入數千里奏凱未七旬  
而振旅之師多有返自中途未完其用者昔之成  
功已蜀如建武之定公孫江陵之降李勢皆在版  
圖之內無足比數廷臣舉

皇祖朔漢

皇考青海成例請勒碑成均以示來許夫秉丹誠而運  
籌決勝永靖荒徼者經略大學士之功也尚可否  
於帷幄衝矢石於行陣者參贊大臣及諸將士力  
也朕何有焉唯是體

乾元之德凜佳兵之戒保大定功安民和衆庶幾可以  
垂則乎乃系之以詞曰

維

天生人類聚羣分凡茲林林孰非我民有羈而縻有誨而  
諄宜伊異視遠近殊倫守在四夷稽古名言無已用  
之寓義於仁蠢彼金夷恃其險阻懸食締張謂莫我  
拒不靖不庭侵厥隣聚駭奔叫以干大咎匪棘匪  
紆獵狁之故我張我伐獵狁之故我師既集賊  
亦相持匪敢相持懼誅自支兩易寒暑救功稍稽  
賊益以狂怒臂當車罪臣既誅以殉我師朕咨於  
恒汝往視之朕咨于恒惟汝同德惟我庶士亦

久于役將茲旗兵羽林神策其勇能罷其心金石  
何敵弗摧何攻弗克濟以汝忠奏捷頃刻 恒拜  
稽首臣敢弗費既禡既宜師出于京師出于京時  
惟一陽未逾五旬乃壓其疆前旌獵獵有節煌煌  
羣番迺驚謂自天降 惟彼攸恃曰良爾吉以傾  
以謀如鬼如蜮其恃爰誅其類股慄紀律是明戎  
兵是詰鑄礮攻礪其守以失惟是懼誅潛弗敢出  
其潛弗出乃旦夕延將齊我軍披其中堅大縣

大膊期日之前彼乃窮蹙乞降悚虔惟命是從六  
事永遵除道築壇肉袒羊牽 赳赳鍾琪乃度之  
勳聿抵賊巢開誠以諭攜其二酋軍門親赴悔罪  
歸誠車塵馬足順斯撫之昭我王度昔也雷霆今  
也雨露 七縱諸葛單騎汾陽曰我相臣於前有  
光晉爵錫服黼黻龍章速歸黃閣左右贊襄休養  
生息惠鮮蜀邦我武既揚無疆惟慶

平定金川方略卷二十七